

續  
文  
獻  
通  
考

續文獻通考卷之七十六

皇明進士雪間王圻纂輯

節義考 節婦四

皇明

宗室知

志

娶賀氏生三女

志

病革度不起賀卽潛靜室自

縊家人驚救之後吞水銀求死又救之遂閉口不食亦  
不言與志同時卒 慶成王以聞 世廟嘉其節 詔  
旌之

肅府沿山王繼妃楊氏未配

王薨楊願入府奉姑守節

終身嘉靖二十八年九月禮部覆巡按路楷題貞烈異  
常 詔楊氏准封 沿山王繼妃入府守節

北直隸

胡氏南城李華妻華隨父出外其姑易氏與徐璉通因逼汚胡氏以滅口胡堅不從易與璉乘夜以土囊掩殺之事聞嘉靖二十年上命立祠曰哀烈諭祭誅易璉孫氏中城時雍坊民趙嘉彥妻嘉彥病亡孫不食而死萬曆十九年以御史楊錦奏旌之

劉氏薊州李彥賓妻年二十四而彥賓卒家貧子幼誓不更適子旣長娶婦楊氏未幾子亦死婦姑相依以貞節自持至老不渝洪武中旌爲雙節之門

梅氏安東人年十八適士人謝黑兒夫疾篤囑曰爾年少勿爲我慮梅泣下欲自盡以隨姑覺而止之曰吾夫婦

無他兄弟備養兄汝娘未婉倘得一子以續吾祀豈不  
美乎梅悟後果生一子夙夜紡績奉舅姑課幼子舅姑  
卒脫簪珥以襄事其子俊亦成立孀居四十餘年有司  
以聞宣德間旌表其門

王氏豐潤縣人嫁興州前屯衛千戶胡海海歿王氏年少  
無子誓不再適人母欲奪其志王氏嘆曰若事二姓孰  
與從夫于地下乎遂自縊正統中旌表其門

房氏鉅鹿人爲魏溥妻溥疾革顙房曰死不足惜但母老  
家貧赤子蒙眇房垂泣曰母慮母子在妾一身溥卒房  
操刀自割左耳置棺中曰鬼神有知相期泉壤終身不  
預燕席事姑敬養訓子成立後孫爲濟南太守

陳氏開州張慶妻慶疾革願以身代謂其夫曰汝死  
父母必再嫁我不如從汝庶幾免辱是夕自經明日慶  
亦死郡人莫不哀嘆

崔氏真定深州周傑妻洪武間傑任兵科給事中以疾沒  
崔氏奉骸骨歸祭奠畢告其親戚曰夫婦義當同穴今  
夫死我無生理遂經死合葬

高氏真定深州人適清河李茂茂充吉安衛總旗墮馬病  
臥高奉湯藥不離左右茂亡悲泣甚哀乃盡散家貲爲  
喪具復買一間棺置尸側至夜沐浴更衣自經死與茂  
合葬洪武中旌表其門曰貞烈

岳氏深州岳興女適傅嘉嘉病革呼岳曰爾年少善事後

夫岳涕泣曰吾豈忍事他人寧俱死及嘉卒岳憑尸號哭遂經死合葬之洪武中表其門曰貞烈

李氏安平人郭士文妻年二十五而士文卒李奉舅姑撫遺孤孝節兼全洪武中事聞旌其門曰貞烈

范氏棗強人蔡甫原妻年二十四而夫卒父母欲嫁之范不從養其姑終身教育諸子咸底成立鄉人嘉其節事聞宣德庚戌旌表

孫氏南宮人御史孟著妻年二十夫亡撫子以慈矢靡他志始終一節事聞宣德五年旌表

張氏安平人翟得妻年二十一而夫以國子生卒於京張聞之遂自縊死事聞旌表其門曰貞烈

施氏定州衛百戶何毅妻年二十一生子甫二齡毅死哀  
痛漿水不入口欲自殺殉葬姑知有孕勸阻之後果生  
子舅姑親戚憐其少欲嫁之施曰夫亡子幼况舅姑年  
老無依可適人乎遂奉舅姑以終撫二子至於成立年  
六十二歲本衛事聞旌表

徐氏藁城人教諭石麟之繼室隨夫之任廣東正統初麟  
卒於官時徐年二十四踰三月生子玉前妻方五歲  
徐攜二幼扶櫬還鄉禮葬養舅姑甚謹舅姑相繼卒皆  
以禮葬之徐以紡績爲生終無異志教二子繼承父志  
勉以修學後登甲申進士任御史成化二年旌表

喬氏臨城王祥妻生一子年方七歲而夫卒家貧守志躬

親紡績撫養幼子始終無玷成化四年旌表

李氏臨城王慶妻生子方五歲而夫卒堅心紡績侍養舅姑恪守婦道始終無玷成化四年旌表

秦氏王璟妻稟性貞恪恪盡婦道璟歿時秦方一十九歲哀痛幾絕生一子名友才守節撫養翁姑欲奪其志秦苦辭誠切翁姑感悟乃止成化中奏聞旌表

劉氏邯鄲民冀相妻夫亡守節終身隆慶五年旌表

高氏棗強人宋亮妻年二十六亮嬰疾日夜籲天求以身代及亮卒孀居五十餘年始終一志成化中事聞旌表

王氏齊道妻北直隸昌黎人隆慶三年旌

陳氏牛氏高邑人洪武初監察御史許顒之妾顒病卒二



妾皆自經死事聞旌爲雙節

南直隸

尤氏溧水人曹子英妻年少夫死尤氏嚙指滴血誓不更嫁有司以聞旌表之

吳復妻楊氏金陵民家女復爵安陸侯守黔陽以疾亡楊氏自縊以殉 太祖親降 手勅封貞烈夫人

石氏句容人朱約妻石歸約甫一歲約病奉侍湯藥三年不懈約卒守節終身洪武間旌表

孫氏劉彥陽妻高淳人彥陽授平江倉官卒於任值兵亂孫氏與一子二女守旅櫬城陷子死於兵孫不從遇害賊脅二女二女紿賊爲埋父母至江濱皆赴水死洪武

中旌表

陳忠妻王氏江東人忠爲都指揮守交趾王隨之會黎賊叛忠陣亡王與二女登行筏出交趾東海城進海門潛賂賊徒收忠尸殮之扶柩浮海南歸以塋後毀容紡績度朝夕卒與忠歸土鄉人謂夫妻忠節兩不愧云

倪氏江寧人十六適張豫豫卒倪年二十六撫二孤益晉稍長遣就學舅姑壽終力營喪事膏沐不施者五十年後益舉進士累官學士宣德間旌表

魏氏上元人伊端妻年二十一歲守節大學士劉定之爲作永貞堂記正統中旌表

鄭瑾妻袁氏六合人年十八受鄭聘而瑾得奇疾不能治

袁告於父母歸鄭侍夫疾二年不懈及歿求自盡家人救之得不死曰我一寡婦耳留此何爲聞者感泣太宰蕭山魏驥作鄭節婦傳

趙和妻孫氏和爲府軍千戶永樂六年征安南卒於軍孫年二十四守節育孤後子輝爲駙馬都尉天順間守臣以聞旌表

任忱妻焦氏江陰衛人忱領應天已卯鄉薦病卒焦時年未三十守節終身弘治間旌表

俞氏江浦人吳達妻年二十二守節有求配者叱罵之輒以刀自盡家人覺而止正德間旌表

江氏六合人馬鑑妻鑑亡躬紡績以事姑教子年八十餘

卒嘉靖間旌表

花夫人邵氏懷遠人東丘侯花雲妻陳友諒陷太平雲死邵以其子燁囑侍兒孫氏卽以死殉

杜氏鳳陽人夫卒於元末杜年二十三守節育孤洪武十年旌表

周氏臨淮人詹奎妻年十七適奎奎卒無子家特貧周守志不二事夫祖母及姑生養歿塋惟謹永樂中旌表

劉錫妻張氏靈璧人錫卒張年二十有三子幼夫兄逼改適張剪髮自矢遺子珍就學後舉鄉貢正統中旌表

金源妻盧氏程義妻何氏俱亳州人景泰中同以守節旌表

胡氏五湖人年十九夫亡守節終身天順間旌表

周鑑妻官氏虹縣人成化間以守節旌表

陳氏宿州人方諒妻諒卒陳年十八守節撫遺腹子亦尋卒陳守益堅弘治中旌表

方淳妻居氏定遠人正德壬申流寇攻陷定遠居死節一時女婦死節者計五十六人賊平侍郎叢蘭上其事

### 詔悉旌表

王綬妻徐氏靈璧人正德辛未流賊猖獗徐被虜不從被三箭七鎗而死時有李希儒妻張氏赴水死董鸞妻茅氏攜子女赴井死事聞俱旌

李驥妻胡氏太和人正德辛未賊攻太和胡不受辱被殺

一時同節王昭妻陳氏李氏女玉蓮後事聞並旌之  
俞氏顧春妻春患病將革與俞訣勉其守節俞號泣不止  
因以指抉雙目不得出乃以剪先刺其左目又欲刺其  
右姑奪其剪諭曰汝欲養舅姑育二子留一目可也俞  
乃止遂守節於焉

彭餘璋妻鄭氏字宜君生儒家歸再暮餘璋卒子方晬抱  
持號哭成殮赴水死正統癸亥旌表

徐宣妻卓氏蘇州人宣卒遺孤二逾年二孤歿旣而舅姑  
皆歿卓操守益堅嘗割股作糜以愈母疾後母亡執喪  
盡禮人稱節孝

葉氏崑山人葉文莊公盛之女字夏景澄合卺四月而夫

歾卽誓死以守先依於母母歿復歸于夏夏之舅歿爲  
喪如禮比卒謂家曰只爲名節二字一生如執玉如捧  
盈虞元凱銘其墓

鄒氏適葉芸成婚僅兩月芸卒鄒毀容誓死不出房限不  
見男子姑曰如火盜疾病何鄒曰火至委軀灰燼盜至  
先自刎疾聽其死不得令醫診察年六十而卒

王彥章妻楊氏華亭人楊年二十四夫亡撫孤端長娶婦  
倪氏端亦蚤死姑婦並以節著正統初事聞並旌表

李從吉妻劉氏及二貞女從吉任上海主簿歿於官劉氏  
訓二女以女道長貞賢壻唐文祥次堅賢壻沈源仲皆  
蚤世母子三人撫三姓之孤各有成壽皆八十餘人爲

作三節婦傳

錢岐妻宋氏華亭人夫卒棄其二女自縊衆姬救之復甦  
誓不復生遂屏食卒年二十五有司以聞 詔旌其門

曰貞烈

張氏三節婦華亭人璿妻胡氏璣妻瞿氏珩妻楊氏俱夫  
亡守節成化中旌表三節之門胡氏又以子貴受封

趙氏女北京人幼有令質刑部尚書張鎰爲次子昱聘之  
未婚而昱卒父母將嫁之女曰我聘於張又誰適乎姑  
衛夫人迎歸華亭守制終身弘治壬戌旌表

何氏女華亭人楊允修妻未婚而夫卒父母強令再適不  
從何自往夫家守制終身以盤車傳餐家人亦莫覩其



面萬曆二年旌表壽七十

袁氏華亭人孝子楊應旂妻夫故守節不渝教子忠裕成立  
立頒鄉薦萬曆二十三年以忠裕奏旌表

桂氏華亭人郡庠生唐鏊妻年二十六鏊亡矢志不二子  
堯賓甫三歲苦訓成名卒爲良吏壽六十七隆慶中巡  
按吳從憲類奏請旌

任仕中婦上海人姓俞氏二十一寡居有女始二歲男始  
五月誓不二天撫教男女女既笄適俞邦用邦用亦早  
喪親戚勸再適女曰再嫁則俞氏祭祀誰奉且辱吾母  
乃歸與母同居守志洪武中旌爲雙節

張文通婦俞氏上海人永樂初文通嬰瘵疾藥不能療囑

俞氏曰吾將死汝年少無子宜善事後人俞泣曰父命以妾事夫夫今死矣又無子女將何從願從夫于地下文通歿是夕俞亦日經正統年旌表

蔡倫婦唐氏上海人夫亡守志育二子式堅皆已成立式娶侯氏亦早卒姑婦並以節著成化中旌表

金氏上海縣庠生金應登女美姿容隆慶中嫁富人徐茅爲妻茅性好賭宦家悍奴因誘之家遂傾復誘其鬻妻因獻于主主遣數十人要迫之金氏義不受辱自縊死任氏華亭民張景妻年十九夫亡屏食數日幾絕復甦躬紡織養舅姑鄉黨稱任孝婦嘉靖癸卯旌表

姚氏華亭庠生馮衍可妻年少夫亡泣哀目昏貞操白首

不渝姊好張德瑜亦節孝俱鄉科姚臣女人稱雙節云  
程氏丹陽人千戶陳存信妻初王師攻常州存信死之  
程氏年二十七聞之號慟幾絕兵退行求其尸歸葬之  
子壽嗣爲江陰衛百戶征閩爲盜所殺存信遂無嗣程  
氏守節不渝被旌

臧氏武進人陳旭妻旭疾革語臧曰吾殆不起汝宜善事  
後人臧泣不能答翌日旭亡臧給家人入室取衣衾爲  
殮具卽自經表曰貞烈

巢氏武進人許聘惲氏子惲父卒女言於親爲制服未幾  
子亦卒父母將擇對女曰恐以一女擇二姓遂自經死  
臧氏武進人故民賈熊妻守節六十七年萬曆二十二年

御史饒位奏聞旌表

蕭氏高淳縣故民陳時美妻二十二歲喪夫守節四十三  
年萬曆二十二年御史饒位奏旌

吳氏三節江陰人吳宗傑妻周氏宗道妻木氏宗善妻花  
氏吳兄弟俱以行役死殊方三婦相與謀歸夫骨附葬  
先塋誓不適他姓 詔表曰三節

楊氏無錫人俞彥昭妻彥昭戍滇南卒楊年二十一子甫  
期家貧誓不他適養姑強以天年終旣而子婦俱蚤世  
楊又撫其孤志愈厲 詔旌之

吳氏江陰人華緯妻正德壬申避賊賊追及吳詐仆負塗  
賊繫之問曰洗塗曰不洗更衣曰不更且誓曰汝當速

殺我我江國公勲臣家女奈何汚耶明日又問答如之  
賊怒爭刃之沈于江

袁範妻陳氏武進人夫亡守節受旌

吳谷祥妻無錫人姓劉氏夫亡守節受旌

趙氏江陰人適夏師顏顏早卒趙誓不他適矢志自守終  
其身惟謹受旌

謝氏宜興人宋仲庸妻夫亡守志終其身受旌

萬敬妻史氏金壇人適敬未閱歲敬得惡疾終家人依俗  
火塋史躍入火衆救獲免瘞畢自經 詔旌表復其家

吳氏丹徒人葛彥祥妻夫亡守節受旌

儲氏丹陽人趙德華妻夫死矢志自守受旌

朱氏金壇人莊秀五妻夫卒守志始終一節受旌

高氏婦高郵人攜其女從夫避亂見道旁空舍入其中賊將迫脫金纏臂與女且語夫令疾行夫挈女稍遠乃解足纏自經賊至焚其舍夫抵牋真夜夢婦告曰我已縊死彼舍其精靈如此

管氏二婦揚州人管賢妻闕氏管哲妻馬氏洪武中賢卒闕氏年二十六一子在襁褓且誓誓死不嫁後哲繼卒馬氏年二十一姑以其無嗣諷之他適馬氏曰伯氏能守節我獨不能乎俱力事紡績以養姑賢子稍長教之學星卜以資日給姑以天年終併力葬之後二婦俱年七十餘郡上其事旌爲雙節

李氏興化縣監生王之麟妻夫亡以死殉隆慶四年旌爲烈婦

高氏江都人儒學生戴和妻永樂中和鄉試不利抱愧投水死高氏每哭踊踰月誓不獨生一日盛飾白姑歸寧父母乃詣夫沈處號數聲投水死事聞旌爲貞烈

方氏合肥人陳順妻夫蚤卒方抱節自守終其身受旌周氏無爲人倪景四妻景四早喪周矢志自守事聞旌表盧聰妻朱氏霍山人夫死姑嫜多誘之嫁朱誓死不二事聞旌表

趙氏巢縣葉榮妻夫亡守節有司上其事旌表

周氏六安州人趙軌妻正德壬申爲賊所掠給還至家携

子女赴水死

王氏合肥人正德辛未賊衆至王懼辱抱子女赴塘水死  
御史聞人詮書王烈婦家以旌之

尹氏華亭陳鳴韶妻韶早卒尹矢志不渝茹苦萬狀以養  
舅姑課子善道成立領鄉薦萬曆壬寅何按院題旌  
孫氏桐城人刑部主事錢時妻時當刑孫拔髮爲縷繫臂  
自矢哀請歸養寡姑旣生遺腹子惠守節不渝被旌  
張氏懷寧人嚴文昌妻文昌早卒張爲守節旌表

陳氏宿松人年二十夫卒陳日夕奠哭守節終身旌表  
王寬妻張氏太湖人寬望江人寬早卒張年少家貧紡績  
以養其姑姑憐其苦欲嫁之張嚙指剪髮以誓姑乃止



守節二十六年旌表

陶氏四節婦桐城人陶鏞妻鍾氏鏞子繼娶方氏繼子亮  
領景泰癸酉鄉薦妻王氏妾吳氏鏞繼俱早喪鍾方各  
守節亮亦早卒妻妾共守一室抗節終身 詔表門曰  
陶氏三世四節

汪世衡妻戴氏桐城人正德間遇流賊欲驅掠之戴抱柳  
樹不動賊以刀厲其頸戴厲聲曰何不速殺我賊怒遂  
殺之

周氏繁昌縣丞之女爲徐俊妻俊卒無子周爲守節成化  
初旌表

胡氏寧國縣人葛之孚妻年二十二而寡生孤觀稍長亦

死胡與婦施氏相勵以節洪武間上其事旌表

金氏寧國縣人年十六歸胡選孫孫有癩疾臥牀安吉叛軍突至家人出走金獨持夫不去後夫歿年甫十八無子持志甚堅洪武末旌表

蕭氏涇縣人趙敬忠妻早寡守節天順間旌表

陳氏宣城人郭祥妻早寡守節正德間旌表

張氏旌德人劉旭妻旭死張少且無子倚妾胡氏遺腹子二婦相吊卒成其志嘉靖間旌表

張氏南陵人劉定妻夫亡守節嘉靖初旌表

阮氏趙仲成妻潘氏姚添麟妻俱銅陵人二婦守節不渝洪武中旌表

黃夫人雍氏貴池人侍中觀之妻與二女同死於節

何氏青陽人年十八適陳杲杲登永樂中進士差湖廣公務卒于道何守節終身旌表

李氏石埭人桂智妻夫亡子幼舅姑欲嫁之乃斷髮截耳守節不渝成化九年旌表

黃氏建德人相延薌妻年二十二夫亡無子守節終身弘治初旌表

吳氏青陽人陳逕妻夫亡守節終身正德中旌表

何文宇妻江氏青陽人年二十七無子夫病革謂江曰願適人乎願事吾父母乎江涕泣不已夫絕遂自縊

俞氏績溪人許德仁妻夫亡撫孤里人高姓者求婚不聽

而怒中以他事俞訴不得免乃詣 闕陳情事下法司  
抵高罪時稱其賢

胡氏績溪章德俊妻夫亡守節旌表

俞氏婺源人鮑叔用妻夫亡守節旌表

孫希賢妻程氏休寧人年二十一寡矢志撫孤卒年六十  
二希賢姪英德亦早卒妻汪氏年二十八無子誓死不  
二時號雙節

程氏休寧人汪道夫妻生二子夫卒未幾而二子繼卒獨  
奉舅姑其父與弟逼使再醮遂自經

汪氏休寧人金希佑妻夫亡守節受旌

陳氏程克良妻祁門人夫亡守節受旌

張氏婺源人胡某妻少貞潔知書年十六而嫁未幾夫亡  
或欲娶之乃嚙指書衣自刎而死

汪氏黟縣人韓文炳妻夫亡守節旌表

張友妻洪氏歙人友死預治塋誓必同穴姑憐其早寡無  
子欲嫁之不聽乃陰納富人聘至期逼之洪曰嫁不辭  
當與夫別乃造夫墓慟哭而歸拜姑告別入室閉門自  
縊

洪氏歙人劉昌妻年二十而寡絕穀十日死

許氏歙縣江務本妻夫亡守節旌表

陳氏六安衛舍餘趙鑑妻夫亡守節終身隆慶四年旌

蔡氏廣德人陳善慶妻年二十一夫亡守節事姑終身不

改洪武初旌表

屈氏大河衛義官張蓋妻蓋死誓不再適隆慶四年旌

呂氏廣德人曹丑兒妻年二十一夫亡姑憐其少欲嫁之以死自誓至老不易永樂二十一年旌表

田氏廣德人俞國良妻年二十四夫亡終身守節旌表

張氏和州人周德新妻夫亡守節終身旌表

尹氏含山人張子文妻夫亡有遺腹子可成尹守節訓育後爲千戶洪武間旌表

包氏高化寶妻和州人夫亡守節終身宣德間旌表

丁氏全椒人袁蘭妻蘭卒丁氏誓不再生竟自縊死旌表

謝氏徐州人段二妻元末兵亂舅姑與夫俱亡乃依父家

守志年八十卒洪武二十五年旌

姜氏沛縣陳恕妻夫亡以死殉隆慶三年旌

白氏沛人李伯奴妻夫亡於邊白年二十薨衣襦食寡居四十餘年宣德間旌

汪氏潁上縣民王敷紀妻夫亡死節隆慶三年旌

薛氏徐州王五妻年十八夫亡子甫週誓不再適正統十年旌表

邵氏徐州民李重妻夫亡守節不改隆慶四年旌

孟氏徐州人居瀚妻年二十餘夫臥病久孟許與同死夫果弗起孟視殮畢從容自縊

胡氏沛縣民張化龍妻夫亡以死殉隆慶四年旌爲烈婦

浙江

平氏仁和人年十九歸同里何富五年而富沒越五月生男誓不再適事舅姑惟謹撫孤至成人四十年如一日  
洪武間旌表

郎氏錢塘高瑞妻未婚而瑞卒矢志守節隆慶四年旌  
彭氏嘉興人父公行鍾愛特甚館張昱爲甥未幾昱病卒  
兒尚在抱旣殯彭求自盡姑泣戒曰吾年老兒年幼且  
病忍棄捐耶乃奉姑命調護其兒兒愈遂絕飲食號泣  
五日而死

李氏桐鄉人年十八適高逾生子熊方暮而逾亡家貧舅  
姑相繼亡往依母居母諭之改適輒慟絕母止不復強



熊旣長娶曹無子爲置妾陸氏甫得子熊又亡曹與陸皆勵操事姑以撫幼兩世三節

沈氏海鹽人年十九適崇德方瑄甫十八日瑄死沈悲摧屢絕而蘇服訖舅姑貧乏令婦依其母母謂年少無子勸改適不從母潛以許人沈覺之紿其母往告外氏母行遂沐浴更衣自縊

沈氏嘉興人太守馬輿之繼室輿以壽終沈年尚少無子悲啼不絕聲者八日遂自經死

梅氏嘉興人父諱江官僉憲擇壻得顧燁妻之燁第進士爲給事中早卒梅卽不食以死

沙氏主事郎理妻安吉人洪武初從夫官京師理死沙哭

曰夫爲忠臣妻獨不得爲烈婦乎遂自經 賜祭馳驛  
歸塋

徐氏烏程人年十六嫁未暮而夫病篤顧徐曰我母老爾  
年少奈何徐泣下引刀斷左小指以死誓夫死遂布衣  
長齋卒年七十六

石門烈婦湖州人莫詳姓氏正德初湖饑婦與其夫及姑  
走崇德石門市乞食婦有殊色市人欲挑之與之食不  
顧與之財亦不顧寓東高橋上伺夫與姑不至及三日  
聚觀者益衆乃從橋躍入水中以死

王氏吳忠妻安吉人家甚貧正德初疫死婦無依有欲收  
之者婦不應乃爲麥飯瘞夫塚前痛哭良久以草簣裹

身自沈溪而死

黃紳妻洪氏淳安人年十七歸紳甫一年而紳死生一女  
一日歸寧父母逼奪其志遂抱女觸寒水濟河以歸終  
其身年九十孀胡氏姪婦吳氏皆幼年孀居守節不變  
人以三貞稱之

何道妻鄭氏淳安人年十六歸道越二歲而寡家貧無子  
舅姑欲奪其志度不能免遂自經死

童敦妻李氏名榮壽昌人年二十四而敦卒營敦墓所結  
壙于旁喪終父欲奪志李知勢不可遏又慮自死遺禍  
舅姑家乃屬舅姑家以後事泣拜而歸自經死舅姑爲  
送衣衾及棺至遂昇塋于敦之旁

石氏金華人諱勝浦江義門鄭洪妻洪爲內藏庫提點以  
他累死獄石乃絕粒不食者八日求其死而不可得遂  
引繩自絕 皇祖聞而嘆曰此真義門婦也

陳氏永康人王和欽妻年二十九夫亡遺孤歲餘苦志守  
節勤以自給孤名德中性至孝一日東門失火德中向  
火稽首火遂西轉人謂節孝所感洪武中旌其門

徐榮妻吳氏武義人年十九歲適榮生子甫三歲而榮死  
未幾榮弟廣繼卒其妻顏氏年二十七撫二孤妯娌一  
志奉姑育子恪守婦節年踰六十洪武中表門貞節

李軻妻俞氏永康人年二十五居孀守節子祿婦吳氏年  
二十九夫亡無子誓繼姑志孫齊娶陳氏年十九亦寡

因自誓曰守節婦女常事况李氏世德有自乎台州王  
一寧題其堂曰一門三節婦四世九賢孫

徐氏名瑩東陽趙爲潛妻年二十七爲潛歿撫遺孤晝夜  
哭者累年有爲言禮婦人不夜哭自是夜惟飲泣間誦  
孝經論語小學以節哀痛氣且絕猶誦割不正不食席  
不正不坐目不視邪色耳不聽邪聲諸語緝緝不絕口  
婦郭氏亦以孝聞有司兩上其事 詔皆旌之

夏氏三節衢州夏應保妻王氏文達妻袁氏文質妻邵氏  
俱龍游人青年喪夫相繼守節歷元末亂離中無少玷  
缺洪武初旌其門爲夏氏三節婦

蔣全娘西安人夏顯七妻夫亡時年二十二子在襁褓值

元末兵亂備嘗艱險誓不改節洪武中旌其門

魏氏衢州人時文壁妻年二十二而夫亡子嵩尚在襁褓魏育幼養姑誓不再適年七十餘志節如一吳紳陳敬宗皆以詩哀之

程氏衢州潘仲岳妻永樂間仲岳戍遼東解戍者見程色戲之程怒解戍者遂以軍政挾與偕行法不能阻程恐在途遭辱卽入室自經死

何與適妻范氏衢州人年二十夫亡撫孤兒奉舅姑雖極貧窘終無二志正統間旌

董貴珍衢州人董士疇女年二十適勞載是未三月而載是卒服闋姑憐其少無子勸改適貴珍剪髮自誓姑不

復強孀居三十七年 詔旌之

吳質妻潘氏松陽人正統間宣平寇起避難橫山賊攻寨兵潰賊至欲脅以行潘不從抱子投崖而死

蔡儼妻包氏宣平人正統中鄉寇作亂包從舅姑避難東巖被執給賊曰我有金銀藏巖穴中當往取之賊以爲然同至其所遂自投崖以死成化二年旌表

谷得與妻陳氏麗水人年二十景泰初鄉賊標掠陳與隣婦同避巖穴被執欲犯之陳憤罵不從賊脅以白刃罵愈厲遂遇害賊去鄉人殮其體塋于小嶺

葉孔賓妻鄭氏青田人孔賓以父卒于官迎喪覆舟死鄭年二十三遺子十月矢心自守妾何氏年猶少鄭謂之

曰我守大家汝無子宜自擇也妾曰主母旣以節守妾當奉承以全其節何以出爲相與同處年各八十餘時人謂之雙節

蔡氏諸暨人王琪妻元至正中張士誠陷諸暨蔡氏避之長寧鄉山中兵猝至有造紙鑊方沸遂投其中而死潘氏妙圓山陰人徐允讓妻元末兵變允讓與潘氏奉其父安避山谷間遇寇斫安傷頸允讓大呼曰汝寧殺我勿殺吾父寇捨安殺讓將辱潘氏潘紿曰吾從必矣若能焚吾夫則吾無憾焉寇爲聚薪焚其夫火方烈潘赴火死安始獲免洪武中旌爲孝節之門

孟貞女名蘊諸暨人許嫁縣學生員蔣文勗未婚文勗克



貢入監爲御史病卒蘊年纔二十聞喪號慟歸蔣執喪三年養舅姑盡孝宣德中旌表

舒貞紹興諸仕俊妻年十八歸仕俊數月俊死于商其姑念貞年幼謀嫁貞以死自誓慕貞者乃重賂其父母私盟之貞知不免給父母治齋荐夫齋畢沐浴衣麻自經死

竇烈婦餘姚姜榮妾京師人榮判瑞縣護郡符時華林賊攻陷其城突入郡堂竇匿其符而榮未之知也賊竟虜竇以行去數里賊中有一郡民求歸賊許焉竇乃密語以符之所在俾歸以告榮再行見道傍有井給賊求飲遂投井以死

潘氏餘姚縣民任正妻夫死守節終身隆慶四年旌

張氏蕭山陳曙妻聘後陳貧不能娶父謀改嫁之張引刀自刎母力奪得不死後歸陳未幾而夫亡張哭之哀未三月卽自縊于寢所

孫氏蕭山人許聘葉氏未幾葉氏子病篤將不起孫卽潛製歛具囑父母令納葉棺尋忽自盡時守浮梁戴珊躬禮其家以旌異之

吳江妻李氏餘姚人舅與夫俱疫死姑幸存有澄水黃姓者謀娶之李誓死不從黃乃通其父詐稱母暴病迎李歸省陰令肩輿者輿至黃氏及出輿則非母家姑亦徐至李度不可脫乃從容請湯沐湯具求如廁久之不出

闢廁戶視之則已經矣

徐氏山陰包慎妻徐歸慎七年而慎死無子同邑右族欲強娶之徐髡髮毀形以相拒既知不免竟自縊死時余享妻朱氏享死朱年二十三無子享既塋辭墓慟絕亦拔河死

馬德真山陰朱偉妻家病疫舅與夫偕亡姑張氏亦病篤德真艱難萬狀待姑疾少愈而母家欲奪其志德真斷指爲誓屹不肯從及姑歿德真撫膺大慟明日死之

李氏蕭山徐輔繼室輔任晉江學訓導妻亡就彼娶李指揮女未幾輔卒于官李年十九父憐其少戒勿隨行不從百計懇留之乃求自盡父母縱之扶櫬歸塋毀容荆

布訓子成立苦節至老事聞旌表

孫妙吉山陰農家女適同里吳善慶慶死尚艾無子邑人有謀爲婚者乃厚賄其尊長令奪嫁之孫知有盟給以供佛飯僧爲亡夫福始行旣具齋乃沐浴更衣禮佛甚恭頃之竟走夫墓縊死

徐氏鄭翰卿妻山陰儒家女嫁未逾月而翰卿遊山右十年不返徐奉舅姑極敬順姑疾劇顙天自代疾果愈後翰卿歸甫旬日病卒徐營塋畢遂絕粒七日死

季氏名添寧波人歸同邑許瑜瑜爲盜所害季抱幼兒從舅氏董仲載走慈谿仲載欲再嫁之季泣訴欲歸自盡仲載不敢復言後盜敗季歸治田廬資其孤從學爲名

系方廣通元  
士年七十卒

陳氏名真黃巖程有德妻洪武間以軍生至京鎮撫陸林見陳美欲污之不從百方脅之陳愈嚴厲遂被毆而死夫訴于朝林以罪誅

盧津奴黃巖趙叔民妻洪武中叔民被誣以黨卒于京明年籍其家盧聞官軍至邑遂題詩壁上飲藥而絕

張璩奴黃巖人適徐宗谷宗谷爲仇人所害張負姑匿巖穴中間道達姻家旣而遺娘生女幸妾生男張撫之若已出明年仇以姑訴受顯戮張始還家招夫魂而塋之誓死不二年五十四卒

林汝殷妻王氏黃巖人生二十歸林未幾汝殷卒里人歎

娶之王斷髮以死自誓其父母防之且勸之力王佯許  
既而防者少懈乃陰囑侍婢分其嫁時服一歸其母一  
予其妹一以爲殯殮之具遂自經死

陳氏名小奴臨海人適王三狗一日其夫爲虎所攫卽攘  
奮悲號而往虎驚駭舍之去負夫以還夫死未幾有欲  
納爲妾者陳不從乃強致聘物促迫以歸陳度不免亟  
走妻巖自投而死

劉文叔温州人榮陽教諭黃應發妻應發死無子鞠其婢  
之子通誓不再適舅垂老孝事甚謹舅卒撫通令就學  
得狂疾文叔慮黃氏絕祀急與婚配生子性通卒乃抱  
性育之就學成名後文叔臨終謂性曰我爲汝家婦不

幸三世短命今保汝成立吾可以下見汝祖矣

續文獻通考卷之七十七

皇明進士雲間王圻纂輯

節義考 節婦五

江西

舒氏四節靖安舒弘道妻王氏年二十八而寡子三長仲甫生子未一周而卒妻陳氏亦操志不二女長曰靖正適項坊張氏次曰靖貞適奉新鄭氏俱蚤寡無出矢志自持皆無愧于母

周琬妻吳氏琬邑庠生早卒殮畢吳自縊死遂合葬

熊氏名審奴豐城人余繼妻年二十一歸繼繼疾度不能起語以備後事熊出篋中衣對繼紉定每襲爲二泣且



謂曰卽有不幸吾當服之以俱死不能獨生繼卒熊視殮畢聞家人議舉棺焚化卽衣所紉衣期赴火家人察其意防之少懈卽自縊與繼同日合葬于施家園

胡氏奉新李瓚妻瓚早卒遺二孤長浹甫三歲次冲尚在懷時有欲奪其志者胡守益厲三十九年始終無玷華林賊亂嘗迫于寇投懸崖不死人謂天佑完節云正德十年旌表

洪氏南昌人張士琦繼室年十七歸張越二載而寡居矢志不二撫夫前妻子源得有成立貞白之操如一日朝廷特加旌表

張文娥新建人指揮使方印妻梧州知府張元春女正德

庚午印督兵討桃源劇盜死之張聞計號曰吾夫以死  
報國吾何難以死報夫一慟遂絕救之得甦有娠默禱  
曰姑俟之生男吾與俱生生女吾與俱死踰月生子恩  
值家徒壁立惟紡績事姑以終天年嘉靖間旌表後以  
子貴封太淑人贈太夫人

陳氏豐城人諱桂妻桂爲江州巡司掾流寇掠其境桂被  
執陳氏同女壽華俱美色賊欲污之遂殺桂陳指賊屬  
罵賊怒又殺之壽華哭抱二屍以血塗面籲天而呼復  
厲聲以罵賊又殺之有司奇其節聞之旌表

張氏奉新人余陽妻年二十二時華林賊衝入縣境張以  
少艾被虜前去至後坪旅店衆欲污之張憤罵曰有死

而已決不受賊奴辱罵不絕口賊斬之

江氏奉新易功廉妻被華林賊執欲污之江堅不從且叱罵之賊怒斷其首

楊氏新建謝聰妻年二十聰卒誓不再適立姪廷和爲嗣娶媳方氏生孫天胤和亦早卒胤長娶鄧氏未幾胤又早卒遺腹生子彥正嘉靖丙辰楊年七十而終事聞旌表

秦氏鄧氏新建人共事夫胡璉秦其妻而鄧其妾也鄧生子綱甫二歲而璉卒二氏俱少誓不再適共撫一孤嘉靖二十四年歲大饑撫臺令民納穀賑濟者表揚義名綱納穀二千石辭義名而願表揚其二母撫臺覈其實

旌以雙節孝義二扁仍上其事 詔旌表之

孫氏新建金日榮妻年二十二榮故長子應輝三歲次應隆甫八月孫勵志守節貧苦萬狀爲人績紉以教其孫孫名銑第進士官知府嘉靖三十六年旌表

徐氏豐城吳都憲祺繼室又張氏李氏俱副室也俱芳齡徐氏事姑以孝聞嘗從祺北上抵河西忽祺墜舟徐躍出俱下水頃抱以出祺逝奉櫬泝長沙風烈舟顛危甚徐哀哭顙天舟乃定李無出張嗣孩提或有以他意諷之者徐曰婦人夫死稱未亡人無再醮禮守適各惟所志張與李泣曰烈女無二肯憚一死辱大人于地下茹苦服縞共撫其孤事聞旌表

何氏進賢胡煌妻正德六年寇至姑老疾艱于行何負之  
踰墻避焉姑尋以驚卒冬寇復至家人逃匿何泣守姑  
柩不去遂被執以行至苦腸坡曰此死所也胡不遂殺  
我遂罵不絕口投入坡死次日夫往收其屍儼然苦生  
人咸哀之

樊鳳英南昌樊昱女聘新建石頭萬尚弘未婚弘病女不  
寢食計至女痛哭亟白母曰吾欲歸治萬郎喪母曰父  
歸乃遣若女痛不能禁卽登樓自縊後合葬焉旌之

徐氏南昌庠生萬文式妻式亡徐年二十七撫一孤亡立  
一嗣又亡再立一嗣不肖蕩覆家產殆盡全無怨悔守  
節終身表其門曰貞節

陳氏樂平人徐德安妻年二十夫病革曰汝年少無子我死汝更善事他人陳泣曰既爲君婦尚忍事二姓乎卽割耳剪髮爲誓夫死納之棺中終身不改節 本朝旌表

鄭氏浮梁人金添鱗妻舅姑與夫繼歿又遭兵亂鄭終無二心洪武乙亥旌表

戴氏鄧謙妻謙會試罹火災戴哀毀踰禮守節自終永樂間旌表

齊氏曹旺七之妻餘干人正德間盜猝至曹氏室齊走匿草莽中賊搜得曳之去齊哭且罵沿途援竹木不行抱樹大罵求死賊刺之仆地而絕夫收其屍創痕不漬血

怒氣勃勃如生章梴傳其事

吳氏葉梁妻正德間盜起梁被創垂死屢目吳意以吳年若貌必有奪其志者吳知之以爪碎其容又斷二指納棺中後母家欲他遣遂不食而死

張氏樂平人董瑱妻年二十六夫歿以節自勵正德三年姚盜猖獗母懼其爲盜所污陰遣其子諷之改嫁以圖自全張泣曰從一而終婦人之義摩去之一夕忽自經劉氏安仁人李介妻正德九年寇至介家擁之以行劉憤罵曰爲婦人而辱于賊生何以見夫歿何以見祖宗于地下乃投于池中賊竟殺之

翁氏廣信之永豐人周德成妻年二十五夫卒撫幼奉姑

守節又玉山葉德彰妻王氏夫早亡守節洪武間俱受旌

徐氏 永豐人傳彥恭妻年二十六夫亡無子以姪爲嗣生孫姪又亡撫孫守志始終一節 永樂間旌表

劉氏永豐人鄭友東妻友東出戍早亡鄭年二十五子甫周且兵亂公姑爲仇家所殺以禮葬之守節無玷永樂間旌表

鄭氏雙節俱上饒人祝氏名臨歸孔貫年二十六而孔貫亡劉氏名錦雲歸貫子麟年二十九而麟亡姑婦相繼守節完璧以終都穆爲作雙節傳

劉氏上饒汪芳妻芳病瘋痿謀更遣之劉泣曰夫貧且疾



妾命也敢不以死從傭紡績以給朝夕正德庚午桃源賊至劉護芳不忍去賊欲辱之不從斬芳首以脅之劉罵聲益厲遂遇害

團氏上饒鄭贊妻桃源賊至團度難兼免使夫舁其姑先走自負孀從之不及被執賊欲污之給求緩乃并其子俱赴水死

張氏鉛山費珣妻珣領鄉薦未第卒張剪髮入廕終居三十餘年節操如一旌表

鍾氏浙江上虞人玉山知縣孫景雲妻弘治十五年景雲卒于官鍾哀慟迫切自縊以從提學邵寶立亭以紀其事

祝氏鉛山人傅岡妻傳教祝年二十六姑議改嫁祝泣辭甚確姑竟欲奪之聘至祝伴爲開門檢飭狀竟赴河邊抱石而死是秋大旱知縣張曷禱不應乃集耆老問故有以祝氏節義告者曷卽具牲醴爲文親詣死所奠之是夕大雨祝之死節處水深莫測後湧成洲俗呼爲節婦洲

蔣氏名善鉛山人適弋陽蘇榮年二十八夫亡撫孤守節事聞旌之

虞氏弋陽人李元順妻正德壬申流賊剽掠元順挈家以逃賊勢迫虞度難免拔簪遺夫曰吾分死矣決不受辱子爲全母計耳果被執且哭且罵聲益厲賊殺之

危氏貴溪聞一貫妻正德壬申桃源賊剽掠危度難免顧  
謂夫曰禍迫矣夫全老祖我負二子且逃後爲賊所執  
出首飾祈免賊取之復逼以去危罵曰吾儒家婦豈爲  
狗彘從耶賊殺其幼子脅之奮罵愈厲遂遇害事聞旌  
表

李氏弋陽人黃觀妻年二十夫喪守節有司奏請旌表  
鄭氏彭澤人鄭英長女年十八嫁同邑民畢彥昇二月而  
夫亡遺腹生子仲遠鄭養老撫幼紡績爲家竟以壽終  
洪武中旌表

董氏南昌人董和用女適德化民魏輔甫四載生男魏宏  
中夫故董氏守節奉舅姑始終無玷永樂中旌表

周氏名端秀湖口人張仲偉妻年十九償于張生子德潤  
周歲而偉亡舅姑憫其家貧子幼欲奪其志周曰寧爲  
張氏鬼不作他人妻孀居三十年水清玉潔鄉人稱之  
劉氏名玉蘭彭澤人年十八適同邑民計偉越五載夫亡  
哀痛殊切圖與俱死旣而翁舉夫喪劉泣告願少留乃  
移別室停之劉苦塊以居悲號傷心嘔血數升父母恐  
遷柩藁葬劉曰吾今得死期矣遂不解衰經七日不食  
而卒舉其屍見袖中所遺巾帨皆夫遺物

危氏南城人寧顏孫妻稟性貞節夫亡時年二十七誓不  
二志翁姑老而子幼危勤紡績以資之守節四十四年  
洪武二十四年旌表

劉氏南城人張孺文妻孺文逝年二十六嫻戚憐其子幼家貧咸勸改適劉氏以不污爲誓朝夕號泣喪明守節三十餘年正統三年旌表

劉氏廣昌人年十九適張世昌生二子俱亡世昌病二年不起劉侍湯藥不離左右世昌卒劉拔髮納于棺中誓不改節景泰三年旌表

劉氏廣昌人陳希妻夫亡劉年二十五甘貧守志誓不再適事聞旌表

聶氏廣昌人年十六配何本容生子三女一而容病聶買藥剗股救治極力及容卒伏尸以哭終身無玷景泰三年旌表

譚氏南豐人年十九適傅志華閏九月而夫卒居喪守節  
事舅姑益謹父娶繼母悍戾譚逐諸子譚規諫憾之謀  
奪其志密聘鄉人戚姓者而譚不覺一日誘之歸見戚  
備粧具請期哭謂父曰夫死肉未寒何忍爲禽獸之行  
亟潛匿於樓之複壁累日不進水漿而死

揭氏廣昌人高宏妻宏以較藝卒建昌家僮歸其喪揭迎  
于邑之東門外哭拜畢遂自肩輿櫬如男子素歷者然  
旣殯朝夕哀哭屢絕而甦越月餘以鎖鑰納兒袖中誘  
之出戶遂自縊死時年二十旌表

儲氏南豐人丘宏妻正德間流賊猝至宏方臥病自知不  
免赴水死儲隨之牽裳而溺

李氏廣昌人妻于黃正德辛未流賊破縣李出亡于牛鼻  
嘴賊執欲污之罵曰我儒家婦不幸被汝執欲殺卽殺  
豈從汝耶賊復持其子刼之李亦不顧仆地求死賊遂  
刃之

何氏廣昌人魏寵妻年二十五喪夫居孀守節正德辛未  
流賊猝至家人各竄何不知所從乃攜幼孩走伊母家  
途遇賊掠之行何義不受污大慟賊奪子而刃之何遂  
投水死

鄧氏名彙玉臨川人適章宗原甫再歲而宗原死室無期  
功親鄧往依父母踰月生子惠數攜歸故廬撫養成家  
洪武末旌表

劉氏名順慶吉水人元國史院編修劉楚奇女臨川饒伯振妻夫亡守節永樂間旌表

黃氏名季貞崇仁王仲高妻仲高以戶役死于郡黃年二十四父母欲嫁之黃曰使吾兄弟或亡其外父奪弟婦以嫁父豈欲乎寧忍饑寒以奉舅姑不可違禮父母知不可強從之正統間旌表

熊氏樂安丘容疇妻夫故無子舅姑且沒哭曰妾不幸如此尚何用此生乃自縊以殉正統間同臨川聶同文妻胡氏旌表

許氏臨川進士何書女適宜黃李時傑傑死年十九守志不二天順初旌



貝克寬妻王氏崇仁人夫亡守節成化間旌

董氏名官員樂安王表之妻年二十二夫卒歛畢卽入室  
自經成化間旌

聶氏名妙真樂安人年十五納同邑王所聘未嫁而所亡  
計聞涕泣欲往弔父母不可聶曰兒雖未入王門然旣  
以身許之不可再醮遂闔戶自經死以其喪歸王氏合  
塋焉成化中旌

郭氏崇仁李賢妻年十九歸于賢病足伏牀者三年旦暮  
侍湯藥久而彌謹比卒歛畢大慟曰妾望夫以終其身  
夫亡無子妾將焉托諸子後國之木尋受旌

萬氏崇仁羅元方妻夫亡守節弘治間旌

詹氏女同嫂李氏臨川人正德壬申盜突至其里姑嫂走避之至舍傍有湖盜追之將及二女相攜投湖而死詹氏樂安洪立妻正德辛未流賊犯邑執詹與男去行至杏村井乃給賊求水密謂男日記母在此井遂投之賊退收其屍面如生時同邑傅俞銘妻易氏詹從妻潘氏俱被執不從遇害

周氏撫州陳忠妻正德七年盜起忠率族人與戰不格潰走周被執自投于沼其伯母王氏楊氏嬭張氏饒氏王氏女金玉俱溺水後皆旌表同邑李貫五妻張氏梁元丑妻周氏梁伯一妻晏氏俱被執不屈遇害

沈氏新喻章伯昌妻年二十五夫亡或諷改適沈曰婦人

足不踐二庭此足一移三綱卽淪吾知有章氏而已洪  
武間旌表

陳貞婦新淦人幼納庠生黃體堅聘堅謫吏金陵貽書娶  
陳父母欲易他女以往陳曰吾命也遂遣歸後體堅以  
呈誤棄市累訴不得白徒步收其屍殮而瘞之乃自經  
于柩側曾榮傳曰生以義歸死以節殉

張氏新喻阮尚德妻年十九夫亡或以無子勸其改嫁張  
曰吾夫無子吾夫之兄弟有子苟可繼嗣吾無他求

詔旌之

蔡氏新喻廖益庵妻夫亡艱于自給或逼其嫁蔡曰妾聞  
餓死事小失節事大事聞立貞節坊

胡氏新喻張和禎妻和禎亡遂不御膏沐以未亡人自處  
立坊表之

丁氏新喻彭元鼎妻年二十一而夫亡所親欲奪其志丁  
曰夫臨終托吾養其母吾今去母孰與養天順間旌  
王氏新喻周達理妻年二十夫亡有強他適者王曰妾聞  
禮一與之醮終身不改苦節壽終事聞旌表

廖氏羅氏新喻人廖爲蕭嘉廸妻羅爲蕭嘉聞妻廖年二  
十三羅年二十一廸聞繼亡同事舅姑清貞一心年皆  
八十餘卒成化間旌

嚴氏清江嚴孟端女適黃時訓年二十七而寡苦節弗渝  
成化間旌

簡氏名祥貞新喻簡啟女適鄒濟泰年二十一夫亡父母欲改嫁簡死誓不從服闋又私納采簡持刀哭于濟泰靈右斷二指誓不再適父母患之乃止成化間旌

彭氏新淦人年十七歸李厚載閱三載夫亡父母欲奪其志彭誓曰從一而終婦人之義遂以針刺毀一目紡績教孤弘治間旌

彭氏清江熊斐妻正德辛未華林賊入城彭被執義不辱死之提學李夢陽立石表其事後受旌

易氏清江縣學生鄧介妻正德乙亥盜入介室易奔出還賊盡脫簪珥祈免賊執不舍欲污之易給與偕行賊不備至江赴水而沒賊追刃之

陳氏清江陳廷瓚妻杜氏瓚子德純妻華林賊至姑媳相攜奔李家塘賊拽入隣居欲污之相持愈力罵不絕口賊并刃之而投于水

邵氏臨江府城劉清徹妻年二十夫死撫孤守節正德間華林賊入城邵走匿孔家塘賊拽之登岸邵蒲伏水中堅不肯行賊怒殺之

熊氏劉清渭妻華林賊至清渭寢疾垂絕家人悉竄惟熊在旁賊掠其貲擁之出戶乃抱幼子僞隨賊行至李隆德塘置子于涯自投水水淺不溺以泥汚面目且罵且拒賊殺之

翁氏劉淮妻華林賊至淮病不能興謂翁當避翁曰君或

不諱我獨以生何爲乃盡其貲與賊賊猶拽至隣寺翁  
仆地不行遂遇害

胡貞女大學士胡廣女吉水人在妊時 太祖皇帝命與  
大學士解縉子爲壻越數月果生貞女名吉慶遂訂盟  
未幾解氏被誣舉家戍遼諸父欲改適貞女以刀截耳  
家人救之血被兩頰因曰薄命之婚 皇上主之父面  
承之一與之盟終身不改今背主違父何以生爲越數  
年解氏蒙宥胡歸解氏終以孝聞

楊節婦泰和刑部主事楊相妻年十九相亡撫子養姑守  
節終身正統間旌表

曾氏三節泰和人進士曾思文妻楊氏年二十四思文卒

守節撫孤嶽旣長爲娶康氏生子洧時年二十四嶽卒  
康守節如其姑有司請旌之 詔下而洧亦卒妻任氏  
人勸之嫁曰吾曾家無背夫婦人亦守節以終

鄧氏婦姓蕭吉水人編修鄧珣妻珣卒年二十二無子貞  
靜自閑勤紡績以終身卒年八十餘天順間旌

劉氏三節婦孫氏文貞廬陵劉燧妻年十八守節胡氏滿  
貞歸燧之兄淪年二十七守節胡氏寧貞歸淪之從弟  
澗年二十六守節皆旌表

羅節婦曾氏名溥秀永豐副使曾鼎女歸里人羅年二十  
三守節成化間旌

羅氏三節歐陽氏吉水人諱壽娘鵝田羅輶妻輶卒婦



年二十五長子篤溫方二歲次篤良尚在妊越四月而生氏撫二孤無他志溫長娶歐陽酉貞生子甫期而溫亡良娶袁氏蘭秀生子五歲而良卒酉貞蘭秀相告曰姑爲節婦我屬獨改節乎協力共守姑年六十卒蘭年五十五卒酉貞年幾九十卒

王氏素英吉水生員周必登妻王氏年十九歸必登弘治七年必登以疾卒王氏誓與同死不食數日母死歸吊一日語弟曰我死屍還周氏弟方出忽以無疾終弟如其言還屍于周里人莫不慟之

胡氏坤秀萬安周賢佐妻庚午之亂貞婦出走賊追急度不能免乃跣坐于地賊驅之起行曰不能行指輿使乘

之曰不能乘賊怒以刀叱之遂伏地而死死頗慘酷行道傷之

蕭氏高安張榮一妻年二十七孀居誓不他適正德初爲華林賊所執且罵曰我誓不爲賊徇辱乃斬之數斷事聞旌表

劉節婦江氏新昌人劉習恭妻夫死江年甚少乃撫遺腹子守節終身正德間旌表

敖氏萬載人張鼎實妻元末舅姑及夫俱歿于寇敖年二十餘無子撫兄子爲嗣撫訓成立洪武中旌表

楊節婦周氏宜春人年十九歸楊伯憲未幾伯憲以同知蔚州卒于官周護喪歸塋撫遺腹子成立年八十三卒

正統初旌表

蕭氏宜春人適庠生劉顯顯早卒蕭年二十五矢志守節撫二孤成立弘治間旌表

歐陽節婦鄧氏安福人父湖廣僉憲鄧年十九歸府庠生分宜歐陽鳳凰沒無子守節自矢弘治間旌

袁氏鄆都人李崇仁妻年二十適仁明年夫故遺腹生子時姑年八十苦節奉養洪武中旌表

陳氏寧都廖國器妻少嫠守節矢不二心後值寇亂子死育幼孫人俊成立年九十餘受旌賜粟帛

謝氏贛縣劉卒二妻年二十九夫亡遺腹生子舅姑衰老躬織以養殯葬盡禮撫孤成立洪武中旌表

歐陽氏賴縣劉德潤妻年二十餘夫亡遺一子玉輝先是  
玉輝曾祖母廖祖母蕭相繼歿居至歐陽凡三世清節  
危撙後先一轍歐陽孝慈尤著洪武末旌表稱三節世  
家

劉氏賴縣朱宗文妻二十八歿居撫遺孤顯後顯領鄉薦  
授石城訓導亦遵母訓稱職永樂中旌表

管氏雩都吳孔暉妻年十五適暉未暮而卒得遺腹子秉  
性矢志不二善養其姑弘治庚戌旌表

葉氏信豐人黃信義妻年二十五夫亡無子孀居砥節年  
七十七旌表

李氏大庾人劉繼妻繼卒李方十九誓不他適所親憐其

少諷之李泣曰吾夫爲官族子苟有二志辱門多矣弘治改元照例給綿壽終八十九

山西

張氏崞縣陳光先妻夫亡守節以壽終隆慶三年旌

馮氏陽曲人董三漢妻年二十一夫亡守節三十餘年宣德五年旌族人名榮者妻郝氏年二十二而寡與馮齊節並受旌表

朱氏陽曲人胡源妻夫亡朱年二十一奉姑撫幼守節二十五年正統六年旌

趙四女夏縣民李汶聘爲妻未婚而汶死女誓以死守隆慶三年旌

梁氏石州人適阮福元州學生卒時梁年二十慟哀不已  
是夜自縊與夫同槨而葬旌爲貞節之門

孫氏五臺人陳紀妻夫亡孫年二十四能以節自勵孀居  
五十餘年無玷成化初旌

焦氏長治縣民李曉妻曉亡不嫁終身無玷隆慶三年旌  
李氏臨汾張晟妻晟爲乾州學正卒時關中兵起道梗不  
能還子文瑗甫九歲李紡績度日兵稍息遂與子負骸  
骨歸墓守志不易永樂初旌

蕭伯政妻平陵人女年十九適舉人姜未幾姜卒子一歲  
孀居四十餘年貞潔不玷永樂八年旌

張氏吉州人張顥女年十九適郝銘甫三歲銘卒守節五

十餘年正統十二年旌

崔參妻信氏聞喜人年二十三夫亡舅姑令再適信弗從  
守節五十六年始終無玷天順間旌

胡氏洪洞人胡復中女年十六適續慧閱六載夫亡胡年  
二十三矢志紡績貞節不渝成化二年旌

朱氏解州李孟冬妻夫亡守節隆慶三年旌

劉氏靈丘人張文德妻年二十五夫亡子政賢甫一歲劉  
矢志守節撫子有立洪武十八年旌

楊氏大同左衛指揮使范安妾居常克敦婦道宣德中夫  
陣亡楊卽自縊以殉家人止之不從竟潛縊死 詔贈  
淑人

陳氏聞喜縣民張文定妻夫亡守節無議隆慶四年旌

柳氏蔚州人王福海妻夫亡柳年二十七子二歲守節不  
玷天順初旌

焦氏大同人齊景才妻年二十四夫亡子幼守節不渝成  
化六年旌

程氏壺關人王觀妻年十九夫亡遺一子甫期程居喪三  
年悲號幾絕者數四終身守節洪武末旌

朱氏潞城人史廣妻廣卒朱年十七子二歲以節自矢終  
身不玷成化五年旌

周氏應州山陰縣民宋積妻積亡周氏誓不再適隆慶四  
年旌



新禎妻王氏黎城人年二十夫亡守節終身成化六年旌  
陳氏汾州人郭世玉妻生子一歲陳年二十有一孀居七  
十餘年兩經大兵藏匿岩穴未嘗虧節 國初特 詔  
旌之

張氏猗氏縣民任宏妻宏亡守節至老不渝隆慶五年旌  
杜氏遼州人李聚妻年二十四夫卒守志峻潔洪武中旌  
陳氏張澤妻遼州人年二十一夫亡事繼姑甚謹終始不  
渝節正統間旌

邢氏沁源人張承祖妻夫亡年二十五無子守志不再醮  
洪武初旌

党鳳妻張氏澤州人年二十三鳳卒以節自矢養姑以孝

撫子有成景泰改元旌

武氏陵川人父母早喪依兄簡居贅邑人張旺爲婿未婚  
旺代簡役病卒同行者函其骨歸武哭之哀既葬遂自  
縊正統間旌

山東

鄧瑜妻胡氏瑜濟南衛指揮同知洪武中將從征囑其妻  
以盡節瑜竟歿于陣胡守節終身 詔旌表

管氏禹城人楊天璽妻璽早歿管矢節終身永樂間旌曰  
貞節

王敏妻周氏德州人夫卒自縊正統十年有司上其事

詔旌表

劉氏歷城人王雲妻雲卒守節無虧子允爲布政景泰三年旌表

盧氏齊東人張珮妻從夫戍京師生子昌二歲珮卒盧年十八扶柩歸塋紡績事姑守節昌娶呂氏昌亦早卒呂亦不再嫁成化十六年表曰雙節

馬驄妻司氏禹城人驄舉鄉試及卒司年二十二子魁方一歲司守節事舅姑盡孝魁後亦舉鄉試成化十七年旌表

殷氏濱州人李陵妻弘治九年夫疾篤顧謂殷曰若之何殷以死自誓及夫卒夜半以孝帶自縊而死

馬氏陵縣人邢端妻端舉鄉試早卒馬守節子東亦舉鄉

試任知縣而卒婦張氏訓子有姑風旌曰雙節

孫氏青城人陳策妻正德六年流賊入境策守東門拒敵死之孫收其屍悲號不食居數日自縊死合葬焉事聞旌之

范瑄妻李氏利津人夫卒守節事姑撫子繡舉進士正德中表曰苦節貞婦

王氏陽信人丁鑑妻鑑亡守節終身嘉靖七年旌表貞節  
曾氏德州人張崇禮妻嘉靖間夫卒自縊因合葬焉

王氏鉅野人馬善經妻夫歿守節終身洪武十七年旌表  
齊氏名淑賢山西代州人適寧陽許超超舉鄉試及卒無子齊守節終身景泰間旌表

高氏武城人王俊妻天順三年夫卒與其妻蔣氏同縊死  
柩側三人同穴而葬旌曰雙烈

李繼妻王氏曹州人繼舉鄉試卒王爲不食而死成化二  
十年旌表

孫氏濟寧州人錢官保妻年十九夫歿于軍骸骨歸孫卽  
自縊正統十一年旌

趙氏名巧雲曹縣人郭憲妻夫卒守節正德六年流賊入  
其家欲污之趙曰吾孀居十八年矣今豈受污辱賊按  
劍厲聲脅之終不從遇害事聞旌表

喬氏定陶縣生員孔彥弼妻彥弼病亡喬守節清白隆慶  
三年旌

孔彥臣妻王氏曲阜人正德六年遇賊死節旌表

趙氏汝上人張鳳翥妻嘉靖五年夫疾語趙曰汝年少雖有女不可恃以終身慎圖之趙未答夫方迷亂將絕趙卽縊死頃之夫復蘇家人語故夫遂瞑目後合塋旌表  
郝氏莘縣人祝大用妻夫早喪郝孀居終身如一日正統十二年有司上其事旌曰貞節

崔氏莘縣人教順妻順早卒崔守節子山仕至提學副使  
成化十二年旌表

孫氏恩縣人李資妻弘治元年夫卒孫觸墻而死旌表  
侯氏館陶人郭維貞妻維貞早歿侯矢志自守撫訓其子  
良後受旌表

張氏博平人吳是妻是卒張守節養姑或勸其再適張一  
慟幾絕于世長舉鄉試正德間旌表

李茂妻王氏堂邑人弘治間茂同吏隸輸稅京師讓誘  
茂醉酣夜分殺之匿其屍王聞馳至京擊登聞鼓訴之  
嘉靖四年旌表

鄒氏莒州人王政妻政亡無子養姪惟子爲嗣亦卒婦邊  
氏事鄒守節終身洪武十七年兩旌之

趙氏蒙陰人宋文美妻孀居矢志自守終身無玷正統間  
旌表

潘氏沂水人王經妻正德六年遇賊死節受旌

劉氏萊陽人董讓妻夫卒守節洪武二十一年旌表

楊芳妻孫氏萊陽人芳舉鄉試卒孫爲守節成化十年旌表

張氏寧海州人王麒妻麒令靖海及卒子軒甫三歲張守節教其子軒後舉進士成化十四年旌表

畢氏文登人邢和妻和亡畢爲守節弘治十年事聞旌表  
閻氏萊陽人曲溥妻正德六年賊入城執閻欲污之不屈被鎗仆地已而聞夫被殺遂自縊旌表

葉氏蓬萊人衛琮妻夫喪葉以節自守嘉靖初有司具事上聞旌之

王氏平度州人車勸妻勸爲青州總管卒王誓不再適子文昇亦早卒婦陶氏守節如姑洪武三十二年旌表



王三妻季氏高密人王歿季爲守節正統八年旌曰貞節  
李氏膠州人王山兒妻山兒早亡李守節天順間旌

趙錢兒膠州人劉倫妻正德六年流賊入其家值趙搗衣  
奮椎擊賊會賊大至遂遇害旌表

劉氏維縣人靈山衛指揮劉奇女正德六年爲賊所執欲  
犯之大罵觸石而死旌表

趙氏遼東大寧人名哇兒年二十夫蕭病劇謂哇兒曰我  
死汝年少若之何哇兒曰君幸自寬脫不可諱妾不獨  
生遂命匠製巨棺夫歿卽自縊同棺殮葬其同郡又有  
趙臙兒妻安氏陳恭妻張氏武壽妻劉氏宋敬先妻謝  
氏並早寡以死從夫事聞悉 命褒表

畢氏新城人夫翰林檢討王象節病故畢潛自縊西城御史奏聞豎坊旌表仍賜御祭

河南

孫氏陽武人陳子英妻英充飛虎衛小旗洪武初從北征謂孫曰吾生死未可知幸有二弱息汝肯撫育乎孫曰君但盡忠報國吾母子弗煩憂也英果死于戰父母欲奪其志孫泣曰吾不忍背夫而生卽欲自盡父母懼乃止矢志終其身

劉氏扶溝縣民張琬妻琬死劉守節終身隆慶三年旌

萬氏密縣人王佐妻佐疾亟顧萬氏曰我死後汝善事後人萬泣誓曰吾與汝同死豈能再緩須臾佐卒夜萬自

縊雙棺合葬洪武中旌

時氏祥符人魏安仁妻仁登進士卒時年二十三事舅姑至孝以女紅供養父母有遺之不受宣德中旌

于氏長葛人程黼妻黼任寧津知縣卒于官子顯在襁褓于年二十六堅志守節顯娶王氏生子玘不踰歲顯亦卒王年二十四家又貧或諷其他適王曰吾姑守節若不能繼生無以見夫孀居數十年姑婦一節正統間旌爲雙節

高氏項城縣童生王大樂妻大樂未婚而卒高願以死守隆慶元年旌

張針姑陳州人年十四許同郡孟七保未幾七保輸稅于

開封卒墓祥符之蘇村父母欲嫁之針姑曰既許孟氏  
今雖亡其母無所依願歸以養之父母重其義從之乃  
與姑詣祥符負其夫尸還墓誓終身姑卒以禮葬  
之立志愈堅年幾六旬受旌

馬氏西華縣民王泰妻夫死守節無玷隆慶元年旌

段門雙節儀封人段整妻魏氏二十三天亡矢志自守三  
子皆成立長子安亦早卒婦胡氏年十九守節如其姑  
成化四年旌曰雙節

張二姐陳留縣民鄭瑁聘爲妻未婚而瑁卒竟以死殉隆  
慶三年旌

于氏儀封人李嵩妻嵩隨父任南京副都未至而卒于年

十九都公憐之欲改配于乃以死自誓居孀四十餘年鄉里不識其面成化五年旌

吳氏封丘人庠生彭儀妻儀卒守志不三載而姑亡子死其母欲改適吳卽更衣沐體潛行至夫墓以手扒墓側土崩尺餘欲進不得飲泣淚竭血繼衣有痕漬自縊于棠樹而死時仲冬棠復生花盛寒不隕人謂貞烈所致成化中受旌

趙氏鄭州人李讓妻讓蚤逝遺腹生子名福舅姑欲奪其志誓不再適成化六年受旌

鄭氏太康人年十六適邑人趙泰越一年趙役京師卒舅姑欲奪其志趙拔髮誓曰生爲趙氏婦死爲趙氏鬼及

卒墓樹有雙鳩來巢成化庚寅受旌

王氏太康人王傑女贅郭浩爲壻浩卒王年二十哀毀骨立遺子果幼後果與妻繼逝僅一孫王教之成立成化庚寅旌

李氏太康縣民劉謙妻謙死守節以壽終隆慶二年旌

裴氏陳州趙璧妻璧貢入監屬裴曰爾爲我奉父母撫小兒未幾趙卒舅姑欲嫁之裴曰許夫以諾而不能信則狗彘不若終養舅姑成其子 詔旌之

張氏太康人晉嵩妻生女甫一歲嵩病革曰我死後寡守何如張痛哭不言私命匠人造大棺殮畢竟自縊合棺而葬旌之

李氏項城人趙二妻二病曰吾死後汝不宜守李泣曰夫死謂之未亡人若有異志他日何以相見于地下未幾遺腹生子曰妾不幸不得事夫今得撫孤成立不墜趙氏幸矣後受旌

許氏雙節襄城人兵部尚書許擴二女長淑貞贅盛全次淑英贅尉善盛尉俱早亡時長年二十三次年二十皆以死誓守旌曰許氏雙節

苗子榮妻張氏歸德人元末夫亡事姑撫幼歷兵變中以節自勵洪武中旌

曹氏歸德人張琮妻琮卒曹紿匠曰夫嘗囑我作棺必寬大匠如其言是夕竟自縊合棺而塋景泰中旌

宋氏陝西咸寧人父暉知歸德州宋適歸德衛千戶趙琳琳卒宋年十九撫其子遜教之甚嚴事姑謹姑病疽宋日舐濯之竟愈成化初旌

黃氏睢州人張貴妻夫卒守節成化初旌

程氏睢陽衛人百戶姚通妻通以疾卒于京程自縊以殉成化初旌

石氏虞城人范俊妻俊舉鄉進士早卒石誓節撫孤子賢仕至順天通判成化七年旌

潘氏睢州人曹文道妻文道領鄉薦不第而卒于途喪至潘出已所服衣盡焚之自縊而死又州學生皇甫廸妻潘氏廸卒潘亦自縊俱成化二十二年旌表



丁氏虞城人吳暉妻夫死守節成化末旌表

楚氏睢州人御史高安妻安病卒楚泣引刀割其右耳誓不二志正德中旌

李氏睢州人王廡妻廡貢士卒李守節不二又考城盛訥妻李氏夫死守節正德十六年旌

閻氏鹿邑人李浩妻夫亡守節嘉靖初旌

孫氏鹿邑人夫卒自縊又史綸妻樊氏考城劉遵妻馮氏俱嘉靖二十年旌

范氏字蟾香歸德人郡士王輔妻輔疾范額天願以身代及卒從容自縊于柩側遂同塋提學楊維聰扁曰貞節蔡氏睢州人天祐孫女適湯希富富病革蔡自製新衣一

襲着之謂富曰萬一君不諱願衣此偕行富曰如此吾  
瞑目矣及卒蔡自縊旌之

李氏寧陵人舉人黃嘉猷妻猷病卒李自縊柩側嘉靖中  
旌

鄧氏惠汝賢妻張氏熊威妻俱睢州人賀氏虞城人段鑑  
妻解氏寧陵人喬文光妻俱夫死自縊嘉靖二十二年  
同旌

張氏柘城縣生員翟思榮妻夫亡以死殉節隆慶五年旌  
爲烈婦

孫氏考城人孫同之妻同死自縊嘉靖二十五年旌  
談氏夏邑人曾泰妻又考城人董譜妻李氏俱夫死自縊

嘉靖二十六年旌

趙氏考城縣義官馮期魁妻夫故守節終身隆慶元年旌  
馬氏臨漳人王從義妻夫亡子二歲善養舅姑洪武十六  
年旌

高氏安陽人名異陸鑰妻適不一載鑰任滄州學正以文  
忤時法當隕身高歛衽前曰夫之不幸妾之不幸夫死  
妻何適遂返室自縊遺子鶴齡甫五歲

郝氏磁州守禦所旗軍袁昇妻昇北征陣亡生男先卒舅  
姑欲嫁之郝以死自誓踰三十年不改成化十七年旌  
秦氏修武人汪彥深妻夫早逝誓不再醮洪武二十八年  
旌

鄭氏溫縣人孟景妻年十七適景二十三夫亡二子俱幼家貧甘于守節父母欲再適之乃截髮自誓躬勤績紡以養舅姑撫育二子守節四十九年天順庚辰旌

杜氏宜陽人陳忠妻年二十夫死遺腹子復禮杜誓死不嫁奉姑甚謹復禮舉孝弟任湖廣宣城縣知縣洪武十二年旌

屈氏靈寶人蘇六妻夫卒屈年二十二截髮矢志不嫁洪武末旌

李氏靈寶人呂材妻年二十二而夫卒孝養翁姑守節終身洪武末旌

孫氏永寧人趙三妻年二十三子甫三歲夫病劇囑孫曰

幼兒無可托者汝寧撫之令成立乎孫氏感其言誓死  
靡他孀居三十五年永樂初旌

牛氏洛陽人及笄父母贅偃師李保兒爲壻未期夫歿牛  
奉柩歸塋誓不他適守志三十二年永樂四年旌

樊氏偃師人汪德深妻歸三年夫亡生一子駒兒樊誓不  
二志壬辰兵亂樊偕舅姑居山西之路州紡績以養洪  
武三年還教子成立正統四年旌

劉氏宜陽人馬瓊妻年二十一夫亡守節始終不渝正統  
八年旌

馬氏宜陽人蔡致中妻歸四載夫亡甘貧守節不二正統  
八年旌

陳氏孟津人劉安妻年二十一夫亡生子三歲守節終身  
成化二年旌

孫氏孟津縣生員李濟衆妻濟衆疾歿孫誓死守節隆慶  
三年旌

匡氏雒陽人董雄妻生二子長威方四歲次武甫半週雄  
病篤曰吾死若肯善撫二子乎不則任所適匡泣曰生  
則同室死則同穴矧有子可恃安敢有他雄沒匡守節  
二孤亦克成立成化九年旌

高氏五節婦俱固始人高希鳳妻劉氏希鳳在遼東與劉  
俱被掠希鳳死劉被虜罵不絕口被殺仲弟葉師奴妻  
李氏早寡移子姪避亂高麗 本朝初復挈家歸守夫

紀一 卷之二十一  
墓誓不再適季弟伯顏不花妻郭氏伯顏爲納喇出所  
絞郭自縊死從子搭失丁妻金氏失丁爲父仇誣陷死  
金氏與姑邢氏義不受辱俱自縊事聞詔旌之

鄭氏羅山人元平章政事李思齊妾元末汝穎兵起思齊  
率兵復郡縣授汝寧知府 天兵至卽內附授江西右  
丞陞中書卒鄭氏自經死事聞追贈淑人謚曰貞烈

范氏汝陽縣民莊十一妻夫亡范年二十七舅姑老子幼  
家貧所親勸之他適遂截髮自誓年八十受旌

周氏固始縣夏維舜聘爲妻未婚而維舜死竟以死殉隆  
慶三年旌

李氏上蔡人吳景和妻和疾李每夜拜北辰願以身代和

卒極力營葬遺腹生子呼天矢曰不幸夫逝今幸有子  
吳氏宗祀可托矣守節終身事聞旌表

沈氏光州人郝昂妻夫亡沈年十九生男文宿甫一歲鄉  
人憐其年少子幼勸其改適沈焚香額天斷左手一指  
誓不再醮四十七年始終一節受旌

袁氏汝州醫士馬元吉妻永樂初元吉卒于京師袁攜幼  
子負骨歸葬養舅姑以天年終子亦成立守節四十餘  
年正統間旌

### 陝西

李氏延安衛生員張世勛妻世勛蚤故李誓不再適隆慶  
元年旌



殷氏 本朝寧夏衛軍餘胡勗妻年十六適勗勗得風疾  
殷每夕祝天求以身代疾韋語曰歿後幸無他適殷曰  
諾夫歿之夕自縊柩前事聞旌表

王氏涇陽縣民任盡孝妻夫死守節隆慶元年旌

李寡婦寧夏人李承恩叛勾引達酋着力免助惡括城中  
美婦獻之寡婦罵賊不從于母五口悉自縊

王氏高陵縣民蕭憲妻憲亡王矢志不二憲子生員韶亦  
早卒妻高氏同姑守節隆慶三年春上聞旌爲一門雙  
節婦

張氏階州文縣監生李含章妻陳氏生員李含美妻高氏  
係含章子生員李恒妻一家三婦守節不渝隆慶三年

旌爲一門三節

景氏邠州民池鳳鳴妻鳳鳴疾卒景氏矢志不貳以壽終  
隆慶四年旌

謝氏平虜堡家丁孫時順妻賊亂死節萬曆二十一年立  
表烈祠以旌之

續文獻通考卷之七十七終